

Liebi Priisdräger,

liebe Panathletinne und Panathlete,

mini Daame und Heere

Nomene Schuelhuus-Abwart, zwei Leerer und zwei Vereinsfunktionär
zeichne mir hüt eine us, wo rächt schwer yzordnen isch. Die bishäri
hänn sich vor allem em Athlet, em sporttriibende Mensch agnoo. Das isch
nit unbedingt d Aigeschaft vo unserem hüttige „gueti Geischt“ oder „stille
Hälfer“, är isch mee en „Alaageberooter“, obwool är als diplomierte
Elektro-Ingenieur ETH nie ufere Bangg gschaftt het. Aer zeichnet sich
dodurch us, dass er syt Joorzäänte dä isch, wo druss kunnt, wenna gilt,
bimene Sportaaloss Ton- oder d Zytmässigs-Alaage yzrichte und z betreue.

Won ich iin vor rund 40 Joor uff dr Kunschti im Margrethepark kenne gleert
ha, isch är jewyls im so genannte Muusighüüsli gsässe und het d Muusig-
Alaag betreut. Wool kai Yskunschtläufere und au kai Ystanzpaar isch nit no
dr Muusig gloffen, wo är gschnitte und uf Kasette brocht hett. Und das isch
langi Joor eso blyybe.

Aer isch es denn au gsi, wo drfür gsorgt hett, dass d Ysschnällläufer uf dr Kunschti nümme uf die schnälle Düüme vo de Zytmässer aagwiise gsi sinn, sondern dangg iim zunere eleggtronische Zytmässalaag koo sin. Zämme mit em Kantonale Leichtathletik-Verband hett me mit de Kenntnis vo unserem hüttige Priisdräger en Alaag poschtet, wo im Winter uff dr Kunschti und im Summer uf dr Schützematte im Ysatz gstanden isch.

Do im Ysschnälllauf nit jede Start am glychen Ort isch, hett är au grad no d Kunschti verkaablet, was vor allem unserem leider zfrue verstorbene Panathlon-Fründ Dölf Pestoni vyyl Freud gmacht hätt. Denn d Drööt, won unsere Fachmaa zooge hett, hän au am Platzspeaker dient.

Bim Stichwort Speaker darf men au grad no erwääne, dass unsere „Guetti Geischt“ in den letschte Joorzähnt au das Metier beherrscht hett. Das könne vor allem die regionale Volleyballer und d Zueschauer vom Top-Volley-Aaloss bestätige

Als „stille Hälfer“ hett är uf dr Kunschti nit nur d Zytmässig bedient, er hett au grad no entsprächendi Computer-Programm entwigget. Isch dr letscht Athlet durs Ziel gfaare, hett är uf e Knöpfli druggt und scho isch die kompletti Ranglische us em Drugger koo.

Als Tonmeischer, Zytmäss-Aalage-Betriiber, Programmierer und Speaker isch dr momentani Mister No Name in de letschte Joorzähnt by folgende Veraastaltige im Ysatz gstande (d Ufzellig erhebt kai Aaspruch uf Vollständigkeit):

- By allne lokale, nationale und internationale Yslauf-Veraastaltige uff der Kunschti im Margretepark,
- by dr Swiss Indoors, wo si nonig e so top-professionel drhär koo sinn,
- bim Top Volley, das unsere Panathlon-Fründ Christoph Socin organisiert,
- by de Volleyball-Regionalmeischterschafte,
- bi divärse Schwimm- und Liichtathletik-Veraastaltige
- und au bi vyyle sunschtige Aalöss in der St. Jakobs-Halle, solang dört unsere Panathlon-Kolleg Rolf Neumaa no s Zepter gfiert hett.

Hüt isch unsere „gueti Geischt“ no als „Aalaageberooter“ in Sache Zytmässig by de Kantonale Liichtathletig-Verbänd vo beide Basel tätig, er isch freie Mitarbeiter bi dr Swiss Timing, die uns jo erscht kürzlig nöcher vorgstellt worden isch, und er isch au regelmässig bi de schwyzerische Halle-Liichtathletig-Meischterschafte in Magglinge im Ysatz.

Für das grosse Engagement, wo dr inzwüsche pensionierti ETH-ler in den letschte rund 50 Joor gleischtet hett, möchte mir ihn hütt mit unserem Panathlon-Priis für den „gueti Geischt“ im Sport ehre.

Und fascht hätt is no vergässe: wo unsere „Alaageberooter“ nonig so oft und so lang hinter syne Apparat gsässen isch und au no für anders Zyt gha hett, isch är e begeischterte Ystänzer gsi.

Und jetzt lüfte mr s Gheimnis und bitte dr Werner Leisinger füre z choo.